

日本後紀序

臣緒嗣等。討論綿書。披閱曩策。文史之興。其來尚矣。無隱毫釐之疵。咸載錙銖之善。炳戒於是森羅。徽猷所以昭晰。史之爲用。蓋如斯歟。伏惟前後太上天皇。一天兩日。異體同光。並欽明文思。濟世利物。問養馬於牧童。得烹鮮於李老。民俗未飽昭華。薜蘿早收渙汗。弘仁十年。太上天皇勅大納言正三位兼行左近衛大將陸奧出羽按察使藤原朝臣冬嗣。正三位行中納言兼民部卿藤原朝臣緒嗣。參議從四位上行皇后宮大夫兼伊勢守藤原朝臣貞嗣。參議左衛門督從四位下兼守右大辨行近江守良岑朝臣安世等。監修撰集。未了之間。三臣相尋薨逝。緒嗣獨存。後太上天皇。詔副左近衛大將從二位兼守權大納言行民部卿清原真人夏野。中納言從三位兼行中務卿直世王。參議正四位下守右近衛大將兼行春宮大夫藤原朝臣吉野。參議從四位上守刑部卿小野朝臣岑守。從五位下勳七等行大外記兼紀傳博士坂上忌寸今繼。從五位下行大外記島田朝臣清田等。續令修緝。屬之讓祚。日不暇給。今(仁明)上陛下。稟乾坤之秀氣。含宇宙之滴精。受玉璽而光宅。臨瑤圖而治平。仁孝自然。聿修鴻業。聖綸重疊。筆削遲延。今更詔左大臣正二位臣藤原朝臣緒嗣。正三位守右大臣兼行東宮傳左近衛大將臣源朝臣常。正三位行中納言臣藤原朝臣吉野。中納言從三位兼行左兵衛督陸奧出羽按察使臣藤原朝臣良房。參議民部卿正四位下勳六等臣朝野宿禰鹿取。令遂功夫。仍令前和泉守從五位下臣布瑠宿禰高庭。從五位下行大外記臣山田宿禰古嗣等。銓次其事。以備釋文。錯綜群書。撮其機要。瑣詞細語。不入此錄。接先史後。綴叙已畢。但事緣例行。具載曹案。今之所撰。弃而不取。自延曆十一年正月丙辰。迄于天長十年二月乙酉。上下卅二年。勒以成冊卷。名曰日本後紀。其次第。列之如左。庶令後世視今猶今之視古。臣等才非司馬。識異董狐。代匠傷手。流汗如漿。謹詣朝堂。奉進以聞。謹序。

承和七年十二月九日

左大臣正二位臣藤原朝臣緒嗣
正三位守右大臣兼行東宮傳左近衛大將臣源朝臣常
正三位行中納言臣藤原朝臣吉野
中納言從三位兼行左兵衛督陸奧出羽按察使臣藤原朝臣良房
參議民部卿正四位下勳六等臣朝野宿禰鹿取
前和泉守從五位下臣布瑠宿禰高庭
從五位下行大外記臣山田宿禰古嗣